

CUMÜN DA SENT



Il mas-chalch da Sent

Publicaziuns officialas. Cumpara seguond bsögn.
2012-2014
no. 37

7554 Sent, december 2014
Ultim Mas-chalch da Sent

Serrada dal büro cumünal sur Festas e Büman

Sur Nadal e Büman rest' il büro cumünal serrà, quai causa lavuors da müdada per ir giò Scuol. Ultra da quai es, our dal medem motiv, tuot il sistem da computer dals 23 da december 2014 fin als 5 da schner 2015 our d'funcziun.

Uschè ha il cussagl cumünal decis da concluder il servezzan da l'administraziun cumünala sün venderdi saira, als 19 da december 2014. Davopro nun es quai pussibel da mantegner plü ingüns servezzans tant da fanestrigl sco eir da tuottas ulteriuras spartas d'administraziun. Bigliets pel Vereina e bigliets dal di pella viafier ston gnir retrats fin il plü tard in venderdi, als 19 da december 2014 a las 15.00h (serrada dal fanestrigl).

Nus sperain süll'incletta e giavüschain a tuot la populaziun bellas Festas da Nadal e pel on nouv sandà, furtüna e cuntantezza.

**Administraziun cumünala
Cussagl cumünal**

La deponia La Fuorcha resta serrada a partir da subit

La deponia resta serrada a partir da subit e quai d'ürant ils mais d'inviern. Displaschaivelmaing as sto constatar, chi vegn repetidamaing deposità, tant giò illa deponia da la Fuorcha sco eir sül plazzal da laina, material na admiss. Il cussagl cumünal appellescha d'interlaschar quai in mincha cas, otramaing ston da quels surpassamaints gnir sancziunats.

Cussagl cumünal

Vignettas 2015

A partir dals 1. da schner bsögna quai la vignetta nouva per l'on 2015 pel transit sün *vias champestras*, per parcar e per lavurar in stabilimaints (*mansteranza*). Id es gnü decis, cha per l'on 2015 vegnan surtuts da mincha singula fracziun dal cumün fusiunà ils uordens champesters actuals. Quai s'ignificha, cha las taxas pellas vignettas restan sco fin da quà. A partir dal 2016 aintra lura in vigur il nouv uorden champester, il qual vegn concepì i' decuors da l'on 2015.

Las vignettas da l'on e quellas da 14 dis ston gnir retrattas in büro cumünal **a Scuol**. Quellas dal di pon gnir retrattas eir amo in seguaints lös publics: **Sent Turissem, Restorant Chasa Veglia, Pensiun Aldier, Hof Zuort, Piazza da campar Sur En, Hotel Val d'Uina Sur En, Restorant da muntogna Vastur.**

Cussagl cumünal

Liftin Sarandschasch

L'avertüra dal liftin a Sarandschasch es previssa sün sonda, als 20 da december 2014, quai scha las relaziuns da naiv permettàn.

Uras d'avertüra d'ürant la stagiun d'inviern 2014 / 2015:

20 da december 2014 – 11 da schner 2015
12 da schner 2015 – 23 da schner 2015
24 da schner 2015 – principi marz

10.00h – 12.00h	14.00h – 16.00h
avantmezdi serrà	14.00h – 16.00h
10.00h – 12.00h	14.00h – 16.00h

Cussagl cumünal

Reglar quints cul cumün

Il quint cumünal vegn serrà giò pels 31 december 2014. Tuots dabuns dal cumün e quints pendants vers il cumün sun da reglar fin il plü tard **venderdi, als 19 da december 2014**. Infra quel temp sun eir da pajar tuot ils quints scadüts, dats dal cumün. Per quints chi vegnan pajats cun retard vegn inchargià ün fit. Chi chi ha prestà alch lavur pel cumün da Sent d'ürant l'on 2014, dess dar giò las uras fin il plü tard **als 15 da december 2014 (quai es absolutamaing necessari per cha'ls pajamaints pon gnir fats amo quist on)**.

Chascha cumünala

Fittanza da la parcella cumünala no. 951 / costa da Tiral (Soblantin)

Il cumün da Sent dà a fit sia parcella agricola (pas-ch cumünal) e quai a partir dals 1. da schner 2015. Annunzchas pigl'incunter il cussagl cumünal. Per ev. dumondas ed infuormaziuns sta a disposiziun il cusglier dal dicasteri, Men Caviezel. **L'annunzcha sto gnir inoltrada fin il plü tard als 18 da december 2014.**

Cussagl cumünal

Quints imposta cumünala e chantunala

l' decuors dal mais da november 2014 sun gnüts protramiss ils quints d'impostas, quai na sco üsità, causa cha quels gnivan uschgliö protramiss adüna pür d'ürant il mais da schner. Il motiv per quai es la fusiun dals cumüns, dimena id ha stuvü gnir dat a tuottas 6 fracziuns la medemba basa da las cundiziuns da pajamaint e.o.p. Nouv pon ils quints eir gnir pajats in duos ratas, dimena als 31 da schner ed als 31 da mai. Fin da qua d'eira quai be pussibel cun üna rata als 30 da gün. Nus sperain süll'incletta da noss abitants per quella masüra.

**Administraziun cumünala
Uffizi d'impostas**

Reservaziun e vendita / cartas da di (GA-Flexi) pella viafier a partir dals 1. schner 2015

A regard la vendita resp. eir reservaziun da las cartas dal di ais gnü decis per seguainta sporta illas fracziuns:

- Pro'l cumün da Scuol sun adüna avanman 5 cartas da di.
- Ils abitants han la pussibilità da reservar üna o plüssas cartas da di pro'l büro d'info da giasts dad Ardez, Ftan, Guarda, Sent e Tarasp (Gäste-Info TESSVM) obain pro'l servezzan d'abitants dal cumün da Scuol.
- Las collavuraturas dal büro d'info da giasts pon verer illa pagina d'internet obain tour sü colliaziun cul servezzan d'abitants dal cumün da Scuol (centrala) per sclerir scha la carta da di es libra e tilla reserva in cas.
- Il servezzan d'abitants dal cumün da Scuol tramett'üna jada l'eivna las cartas da di reservadas a mincha büro d'info da giasts.
- Ils abitants han la pussibilità d'ir a Scuol per la/s carta/s da di, obain d'ir ün pèr dis plü tard il büro d'info da giasts da lur fracziun per la/s carta/s reservada/s. Pro la seguonda varianta ha da gnir pajà l'import al büro d'info da giasts e quel rinvescha l'import al cumün da Scuol.

Chaistas nairas illas fracziuns

Il nov cumün üttilisescha las chaistas nairas illas fracziuns inavant sco fin da qua per plazzar las publicaziuns ed uschè nu's müda inguotta pella populaziun chi's vuol indreschir lasupra.

Charteras illas fracziuns

Ils abitants illas fracziuns han l'ocasiun da metter roba pel cumün da Scuol in charteras chi's rechattan illas fracziuns (chasa cumünala). Quellas vegnan svödadas duos jadas l'eivna, e quai il lündeschdi e la gövgia a las 15.00h.

**Cussagl cumünal
Administraziun cumünala**

Eivna “a Sent be Rumantsch”

Fingià pella terza jada haja gnü nom “a Sent be Rumantsch”. Üna sporta grondiusa, preziosa ed üna fich cordiala reclama per nos bel cumün. La partecipaziun da bundant 40 persunas derivantas da ca. tout la Svizra ed il fat cha’l cuors d’eira vendü oura cuort davo cha quel d’eira publichà i’l internet, demuossan l’importanza da quella sporta. Schi’s po leger illas gazettas “participants vuessan tuornar” fa quai amo daplü plaschair. Il cussagl cumünal vuess ingrazchar cordialmaing als organisaturs pel fich grond ingaschamaint e pella gronda lavur organisatorica sco eir als ospitants ed a minchün chi ha portà pro in ün l’oter möd pella reuschida da quell’eivna. I vegn cuntinuà cull’eivna a Sent be Rumantsch e quai darcheu dal 2016.

Cussagl cumünal

Rapreschantaziun locala Sent i’l cumün da Scuol

Illas discussiuns dal proget da fusiun es adüna darcheu gnüda tematisada l’importanza e la pussibilità d’üna gruppa chi’s dedichescha als bsögns individuals dals singuls cumüns (fracziuns). Tenor pct. 8.8 dal rapport da fusiun e tenor pct. 4.9 da la missiva pon las fracziuns installar üna rapreschantaziun locala. Nus eschan da l’avis, cha’ls abitants da Sent dessan discuter, schi vöglian insomma üna simila organisaziun e scha schi in che fuorma. Perquai invidaina ad üna sairada da discussiun chi ha lö

in gövgia, als 18 da december 2014 a las 20.00h illa chasa Misoch

Il böt da la sairada es, d’udir bsögns, schanzas e dubis in vist’al nouv cumün da Scuol e da discuter fuormas e structuradas pussiblas per üna rapreschantaziun locala da Sent invers il cumün da Scuol.

**Amiaivelmaing invidan
Jon Carl Rauch ed Andri Poo**

Vendita da bös-chins da Nadal




Ils bös-chins da Nadal vegnan distribuits in **lündeschdi, als 22 da december 2014** da las 15.00h fin a las 17.00h pro’l lavuratori in Palüzot. Quels vegnan furnits da la ditte Schutz da Filisur. Il cumün inchasch’ils seguaints predschs:

bös-chins pitschens frs. 15.00 / mezdans frs. 20.00 / gronds frs. 30.00.

Id es scumandà d’allontanar ils **bös-chins dovrats cullas immundizchas**. Perquai ramassa quels il cumün, in duos jadas, pro’ls bügls da Stron, Sala, Schigliana, Plaz e Curtin als **29 da december 2014** ed als **5 da schner 2015**.

**Administraziun forestala
Il silvicultur**

Fanestras d'Advent a Sent ❄️🕯️🔔★



Forsa vaivat fingià chattà üna o tshella fanestra decorada ed ingluminada...
Qua suotvart la glista culs noms da tuot quels chi imbelischan quist on nos cumün.

Grazcha fichun a tuots e bellas Festas da Nadal

Sabine e Gianna

1. Milla Nogler	13. Tina Weiss
2. Vera Felix	14. Madlaina Franziscus
3. Claudia Lopes	15. Barbla Buchli
4. Gianna Rauch Poo	16. Marianne Werro
5. Bacharia Zanetti	17. Rita Nuotclà
6. Chrigi Benes	18. Nataglia Caviezel (Scoula)
7. Fina Zanetti	19. Butia da Plaz
8. Regula Felix	20. Nienke Ebben
9. Birgit Rathmer	21. Silvia Theiner
10. Ladina Guler	22. Theres Defilla
11. Sabine Kaufmann Staub	23. Dorota Jacobs
12. Aita Zanetti	24. Tina Puorger (Scoulina)



Charas Sentinras e chars Sentiners

Sco rapreschantantas dal cumün pella Pro Senectute vulessna s'ingrazchar cordialmaing pellas numeruras portas avertas e pel sustegn, il qual nus vain pudü sentir d'ürant ils ultims ons. Nus ans allegrain d'ulteriuras numeruras uras pachificas cullas senioras ed ils seniors da Sent. Nus giavüschain da prenotar las seguaintas datas:

6 da schner 2015: Hermann Thom (cusgliader social da la Pro Senectute infuormescha sur da dumondas dal provedimaint per la vegldüm)

3 da favrer 2015

3 da marz 2015

7 d'avrigl 2015

5 da mai 2015

Infuormaziuns plü detagliadas chattan Els mincha jada illa chaistina "Kirchenkästli" sper la butia dal Sport Champatsch.

Nus Tils giavüschain bellas Festas da Nadal e tuot il bun pel on nouv.

**Chatrina Ritzmann ed
Annelise Süsstrunk**

Uras d'avertüra sur Nadal e Büman:

marcurdi, 24 december 2014 8.30 – 11.00 / davomezdi serrà

marcurdi, 31 december 2014 8.30 – 11.00 / davomezdi serrà

gövgia, 1. schner 2015 serrà

venderdi, 2 schner 2015 8.30 – 11.00 / 15.00 - 17.30

La Banca Chantunala Grischuna giavüscha ün bel temp d'Advent.



Banca Chantunala
Grischuna

Sent

Olga Hänyy

Uris d'avertüra dal büro Sent Turissem e l'agentura da la Posta sur Nadal e Büman

Marcurdi 24 da december 2014 09.00h – 11.15h e 15.00h – 17.30h

Gövgia e venderdi 25 e 26 da dec. 2014 serrà

Marcurdi 31 da december 2014 09.00h – 11.15h e 15.00h – 17.30h

Gövgia 01. da schner 2015 serrà

Nus giavüschain a tuots bellas ed allegraivlas Festas da Nadal, tuot il bun e blera furtüna per l'on nouv!

Sent Turissem

Uris d'avertüra da la biblioteca sur Festas e Büman

Lündeschdi 22 da december 2014  16.00h – 17.00h

Gövgia 25 december 2014 serrà

Sonda 27 december 2014  16.30h – 17.30h

Lündeschdi 29 december 2014  16.00h – 17.00h

Gövgia 01 schner 2015 serrà

Sonda 03 schner 2015  16.30h – 17.30

Gruppa da biblioteca

Uris d'avertüra da las butias sur Festas e Büman

Marcurdi 24 december 2014 tuot las butias sun avertas tenor ils uraris da las sondas

Gövgia 25 december 2014 serrà

Venderdi 26 december 2014 serrà cun excepziun da:

Furnaria Clalüna: avert 8.00h – 10.00h

Sport Champatsch: avert 8.30h – 10.00h e 16.00h – 18.00h

Marcurdi 31 december 2014 tuot las butias sun avertas tenor ils uraris da las sondas

Gövgia 1. schner 2015 serrà

La Butia dal Volg es averta minchadi eir sur mezdi

➔ dals 15 da december 2104 fin als 4 d'avrigl 2015.

Butiers e butieras da Sent

Fich stimada cliantella

Id ais darcheu uschè inavant, ün on va planet a fin. Nus nu vuessan interlaschar da Tils ingrazchar sün quista via cordialmaing per Lur fidel sustegn d'urant tuot l'on, il qual nus stimain fich. Invezza da dar regals vaina decis, da sustgnair quist on a la scoulina da Sent ed ad üna giuvn'atleta pro sia structura sportiva da basa. Nus eschan persvas d'avair agi eir in Lur sen e Tils ingrazchain per l'incletta. Ad Els ed a Lur famiglias giavüschaina da cour bellas Festas da Nadal e pel on nouv Tils dessan accumpagnar noss meglders giavüschs per sandà e furtüna. Nus ans allegrain darcheu da Lur visita i'l on nouv.

Bacharia Zanetti

Reto, Sabina, Fabio e Lara

CHALENDER LADIN 2015

Ils chalenders sun in vendita.

Pro quellas persunas chi han cumprà eir oters ons il chalender picharana prosmamaing porta, per til manar in chasa. Sch'inchün nouv vess jent il chalender dessa'l s'annunzchar pro:



Corina Caviezel

081 864 99 40



Annatina Nuotclà

081 864 08 56

Eir il "Sgabuz" vend' il Chalender Ladin.

Ingrazchamaint dal capo cumünal

Stimadas convaschinas, stimats convaschins

L'on 2014 s'avicina a la fin ed il temp d'Advent e da Nadal sta avant porta. Quai es il temp per dar ün sguard inavo sül ultim trienni d'uffizi 2012 – 2014 dal cumün da Sent. L'on 2014 es per nos cumün ün on tuot special, l'on i'l qual la populaziun ha decis da far part a la fusiun dals 6 cumüns. In meis pled da cuvits, als 8 da schner 2012, vaiv'eu miss in vista böts, tanteroter d'eira quai la partecipaziun da Sent vi da la fusiun e da chattar üna soluziun cuntantaivla culs stabilimaints da la Posta/Turissem e Grotta da cultura. Cun satisfacziun poss dar ün sguard inavo e constatar, cha quels han pudü gnir raggiunts, quai sper ulteriurs progets chi sun reuschits e natüralmaing sper las lezchas dal minchadi chi's ha pudü evader.

Pro quist'ocasiun vuess ingrachar da tuot cour amo üna jada eir a quellas persunas chi nun han fat part a l'ultima radunanza, pel sustegn cha mia persuna ha obtgnü e pudü resentir d'urant ils ultims 3 ons. Meis sincer e cordial ingrazchamaint drizz a tuot ils impiegats e funcziunaris da las numerusas cumischiuns, chi's han ingaschats a böen da nos cumün. Pustüt vuess ingrazchar a Vus stimadas convaschinas e stimats convachins pel sustegn demuossà tant a l'urna sco eir in radunanza.

A Vus tuots giavüscha bellas Festas da Nadal e tuot il bun pel 2015 cun sandà e furtüna.

Capo cumünal

Albert Mayer

Fich stimada populaziun da Sent

Sco a tuots cuntschaint va a fin l'era dal cumün da Sent ed a partir dal schner 2015 han ils 6 cumüns resp. las 6 fracziuns be amo ün'administraziun e quai illa chasa cumünala dal cumün da Scuol. La chasa Misoch nu dvainta però vöda, in quella as rechatta lura il servezzan forestal, dimena ils silviculturs dal nouv cumün. Quist es uossa oramà l'ultim'ediziun dal Mas-chalch e nus stuvain tour cumgià da quel. Nus da la redacziun e da l'administraziun vain adüna gnü plaschair da pudair publichar tuot las novitats davart dal cumün - cussagl, mo eir davart da da nossas numerusas societats chi demuossan üna grond'attività ed ingaschamaint a böen da la cultura. Il mez da comunicaziun dal nouv cumün nun es amo cuntschaint ed i nun es amo cler schi dà là eir ün Mas-chalch o scha quai succeda in basa d'oters mezs. A temp ütil gnarà datta l'infuormaziun adeguata.

Nus vuessan quattras giavüschar a Vus ed a Vossas famiglias ventüraivlas Festas da Nadal ed ün bun on nouv cun sandà, furtüna e cuntantezza. Illa fracziun da Sent dess regner inavant il spiert cultural e l'attività da las societats sco fin da qua. Tuot il bun!

Administraziun cumünala

Pella redacziun il chanzlist M. Fallet



Cumün da Sent

Agiunta al Mas-chalch dal mais december 2014

Comunicaziun da la cumischiun sindicatoria

A la radunanza da rendaquint da gën 2014 vaiv'ün voutant da Sent fat surasèn, ch'areguard las entradas da las taxas da cura e las taxas da promoziun d'economia nu possa tuornar alch. Sün quista constataziun ha tut il president da la cumischiun sindicatoria il pled ed ha infuormà, cha'l post da la revisiun da quint extern ed eir la cumischiun sindicatoria hajan fat las medemmas constataziuns e cha'l cas gnüa scleri. D'utuon ha lura la cumischiun sindicatoria incumbenzà a l'administraziun cumünala da sclerir l'affar e da rapportar lasupra. Cuort davò l'ultima radunanza cumünala es la cumischiun sindicatoria gnüd'infuormada sur dal fat. Id es gnü constatà, cha divers quints da l'on 2013 sun gnüts facturats pür d'ürant la prümavaira 2014. Implü s'haja constatà cha pro plüs cas nu d'eira gnü fat il quint. Quatras pudaina confermar, cha pro quels cas esa gnü facturà davopro il quint e suottamiss per pajar. Implü es gnü fat ün congual da plausibilità culs ons avant e no pudain confermar cha la chosa saja gnüda missa in uorden.

Per la cumischiun sindicatoria

Il president

Andri Lansel

Ingrazchamaint a las instanzas ed als impiegats cumünals

Stimadas votantas, stimats votants dal cumün da Sent.

In incumbenza da la cumischiun sindicatoria ed in nom da tuot la populaziun dal cumün da Sent laina in quist mumaint istoric ingrazchar fich al capo cumünal cun seis collegas e sia collega dal cussagl cumünal, al cussagl da scoula, a la cumischiun da fabrica e da planisaziun, a la cumischiun da l'arrondimaint ed a la cumischiun da lavinias, a tuot ils impiegats cumünals insembel cun la magistraglia da Sent, al pedel da scoula, al archivar ed a la caluostra da Sent per la gronda e buna lavur prestada a favur da nos cumün. Eir a meis collegas da la cumischiun sindicatoria ingrazch eu fich pel sustegn ch'eu n'ha pudü giodair d'ürant quist temp da carica. A tuots quels chi finischan lur carica giavüschaina chi possan giodair lur temp liber a plaina satisfaziun. Als impiegats cumünals sco eir a la magistraglia giavüschaina blera motivaziun per la prosma sfida e cuntantezza i'l nouv impiegi pro'l cumün fusiunà.

La cumischiun sindicatoria giavüscha a tuots ün quaid temp d'Advent, bunas Festas ed üna bella fin da l'on. Ün cordial grazcha fichun per vos ingaschamaint instancabel!

Per la cumischiun sindicatoria

Il president

Andri Lansel